

आकाशवाणी

खास-खास खबरां

1. भारत- इटली आर्थिक रिश्ते गी होर डूंगा करने लेई भारत- मध्य पूर्व- यूरोप आर्थिक गलियारें गी होर विकसित करने पर सहमत होए।
2. केन्द्रीय मंत्री पीयूष गोयल होरें आखेआ जे कुल संसारी संकट मझाटे भारत दी GDP 6 इशारिया 4 फीसद थमां बढियै साङ्गे 6 फीसद होई गेई।
3. रक्षा मंत्री राजनाथ सिंह- दक्खन कोरिया दे देशभक्त ते वयोवृद्ध मामले दे मंत्री क्वोन ओह-उल होरें अज्ज सियोल दे इम-जिंगक पार्क च भारतीय युद्ध स्मारक दा सांझे तौरा पर उदघाटन कीता।
4. कृषि मंत्री शिवराज सिंह चौहान होरें आखेआ जे भारत नै कृषि च नमां ग्लोबल मॉडल पेश कीता।
5. केन्द्रीय रेल मंत्री अश्वनी वैश्वनी वैष्णव होरें अज्ज नमीं दिल्ली च फील्ड अधिकारियें कन्नै इक उच्च स्तरीय सुरक्षा जायजा बैठक कीती।
6. विदेशमंत्री डाक्टर एस.जयशंकर होरें कैलाश मान सरोवर यात्रा-2026 लेई यात्रिएं दी ताल लेई ड्रा कड़ेआ।

<><><><><><>

India –Italy

भारत ते इटली नै बपार निवेश ते सप्लाई चेन दी मज़बूती आस्तै भारत- मध्य पूर्व- यूरोप आर्थिक गलियारें गी होर विकसित करने पर सहमति जताई ऐ। इक सांझे ब्याने च प्रधानमंत्री नरेन्द्र मोदी ते इटली दी प्रधानमंत्री जॉर्जिया मेलोनी होरें भारत मध्य पूर्व यूरोप आर्थिक गलियारे पर सहयोग करने दी अपनी बचनबद्धता दोहराई ऐ। रोम च प्रधानमंत्री नरेन्द्र मोदी हुंदे कन्नै इक सांझे ब्यानै च इटली दी प्रधानमंत्री जॉर्जिया मेलोनी होरें भारत- मध्य पूर्व- यूरोप आर्थिक गलियारें गी इक प्रमुख सम्पर्क ते आर्थिक गलियारा दस्सेआ। प्रधानमंत्री मोदी होरें इस गल्ला गी दोहराया जे गल्लबात ते कूटनीति गै अगगे बढने दा इक मात्र रस्ता ऐ। इटली दी प्रधानमंत्री होरें आखेआ जे इनें क्षेत्रें बश्कार आपसी जुड़ाव गी मज़बूत करना इक महत्वपूर्ण प्राथमिकता बनी दी ऐ। उ'नें आखेआ जे दवै मुख्य इस गलियारे दे विकास दा मज़बूती कन्नै समर्थन करदे ना।

<><><><><><>

Piyush Goyal

उद्योग ते बपार मंत्री पीयूष गोयल होरें आखेआ ऐ जे वैश्विक संकट दे चलदे भारत दा सकल घरेलू उत्पाद-GDP 6 इशारिया 4 थमां बढियै 6 इशारिया 5 फीसद होई गेआ ऐ जेड़ा जे इक सौ 40 करोड़ भारतीयों दी क्षमता गी दर्शादा ऐ। नमीं दिल्ली च आयोजित अमरीकन चैम्बर ऑफ कॉमर्स दे सालाना शिखर सम्मेलन गी सम्बोधित करदे होई गोयल होरें आखेआ जे एह उपलब्धी भारत गी दुनिया कन्नै आत्म विश्वास कन्नै जुड़ने दी बढदी क्षमता गी दर्शादा ऐ। चालू खाता घाटे पर उ'नें आखेआ जे सरकार इस स्थिति कन्नै निबड़ने आस्तै केंई गैंड पुट्रा रदी ऐ।

<><><><><><>

Rajnath -South Korea

रक्षामंत्री राजनाथ सिंह ते दक्खन कोरिया दे देशभक्त ते व्योवृद्ध मामले दे मंत्री क्वोन-ओह-उल होरें अज्ज सियोल दे इमजिंगक पार्क च इंडियन वॉर मेमोरियल दा सांझे तौरा पर उदघाटन कीता। कोरियाई युद्ध दी 75मीं साल गिरह दे मौके पर यादगार समारोह दे हिस्से दे तौरा पर बनाया गेआ एह मेमोरियल युद्ध दौरान भारतीय सेना दी 60 पैरा फील्ड एम्बुलेंस ते भारत दी ,कस्टोडियन फोर्स पासेआ दिती गेई हिम्मत- बलिदान ते मनुक्खी सेवा गी श्रद्धांजली ऐ।

<><><><><><>

Cosmetic- Injections

सरकार नै आखेआ ऐ जे उपभोक्ता- प्रोफेशनलें ते एस्थेटिक क्लीनिकें गी कुसै बी कॉस्मेटिक उत्पाद गी इंजेक्शन दे तौरा पर इस्तेमाल करने दी इजाज नैई ऐ। सेंट्रल ड्रग्स स्टैंडर्ड कंट्रोल Organisation नै आखेआ ऐ जे कॉस्मेटिक दा मकसद सिर्फ मनुख दे जिस्म पर रगड़ना- छिड़कना जां स्प्रे करना ऐ।

<><><><><><>

Agri. Minister

कृषि ते करसान कल्याण मंत्री शिवराज सिंह चौहान होरें आखेआ जे भारत नै खेती दा उत्पादन बढ़ाईयै- खुराक सुरक्षा गी मजबूत करियै लक्खें करसानें दी जिन्दगी च खरे बदलाव आनियै दुनिया दे सामने इक नमां मॉडल पेश कीता ऐ। रोम च प्रधानमंत्री नरेन्द्र मोदी होरें गी खुराक ते खेती सरबन्धी संगठन (FAO) आसेआ मेडल दिते जाने पर खुशी जाहिर करदे होई चौहान होरें आखेआ जे एह सम्मान- नमें भारत दी बढ़े मान-सम्मान दा प्रतीक ऐ। उ'नें आखेआ जे दुनिया- भारत दी योजना- नेतृत्व ते इंसानियत दे नज़रिए गी मान-सम्मान दी नज़र कन्नै दिखदी ऐ। उ'नें आखेआ जे एह अवार्ड मुख्य दे मेहनती करसानें दा जीता-जागदा सबूत ऐ। मंत्री होरें जोर देइयै आखेआ जे सरकार नै कोविड महामारी दे बाद थमां तकरीबन 80 करोड़ लोकें गी दुनिया दा सम्भनें थमां बड्डा खुराक सुरक्षा कवच दिता ऐ ते पी.एम. किसान सम्मान निधि स्कीम दे जरिए लक्खे करसानें दी मदद कीती ऐ।

<><><><><><>

Vaishnav -Security Meeting

केन्द्रीय रेल मंत्री अश्वनी वैष्णव होरें अज्ज नमीं दिल्ली च फील्ड अमले दे अधिकारियें कन्नै इक उच्च स्तरीय सुरक्षा जायजा बैठक कीती। बैठक दौरान एह गल्ल सामने आई जे ट्रेनें च हाल च गै होई केई अगग लगाने दी घटनाएं दी शुरुआती जांच च असामाजिक तत्वें दे शामिल होने दा पता चलेआ ऐ। मंत्रालय नै आखेआ जे नेही घटनाएं गी संजीदगी कन्नै लैता गेआ ऐ ते रेलवे प्रोटेक्शन फोर्स इंदी सक्रिय तौरा पर जांच करा रदी ऐ। सुरक्षा जायजा बैठक दौरान चर्चा इक बेहतर रिपोर्टिंग सरिस्ते दे जरिए- फील्ड थमां खुफिया जानकारी कठेरने दे तरीकें गी मजबूत करने पर केन्द्रीत ही। ट्रैकलोजी कन्नै चलने आहले सिक््योरिटी सिस्टम गी बेहतर बनाने- रेलवे नेटवर्क च CCTV कवरेज बढ़ाने पर बी जोर दिता गेआ।

<><><><><><>

NHAI-DPR

राष्ट्री जरनैली सिडकें सरबन्धी भारती प्राधिकरण NHAI नै कटड़ा- रियासी- माहौर- गुलाबगढ़- नन्दीमार्ग- कुलगाम लेई प्रस्तावित 4 लेन आले जरनैली सिडक गलियारे लेई तफ्सीली प्रोजैक्ट रिपोर्ट तयार करने लेई टेंडर मंगे ना। इस गलियारे राहें जम्मू ते दक्खनी कश्मीर बश्कार सिडक राबता मता बेहतर बनोग। अधिकारिक दस्तावेजें मूजब- एह प्रस्तावित गलियारा खिते च ट्रांसपोर्ट सरबन्धी ढांचे गी मती मजबूती देग। इस पैहलकदमी दे कन्नै जात्तरा दा समें बचोग- सैलसफा गी बढ़ावा मिलोग ते प्रदेश दे प्हाड़ी जिलें च बपार ते आर्थिक विकास गी बी बल मिलोग। इस प्रस्तावित जरनैली सिडक कन्नै माहौर- गुलाबगढ़ ते नन्दीमार्ग ज्नेह दूर-दरेडे इलाकें तोड़ी हर रुतै दरान चालू रौहने आला सिडक राबता हासल होग।

<><><><><><>

OGW- Kulgam

केन्द्र शासत प्रदेश जम्मू-कश्मीर दे सुरक्षाबलें कुलगाम जिले च आतंकवादियें लेई कम्म करने आहले इक Over Ground Worker गी गिरफ्तार कीता ऐ। पुलस- सेना ते CRPF आसेआ कुलगाम जिले च सांझा अभियान चलाया गेआ ते इक संदिग्ध व्यक्ति गी गिरफ्तार कीता ऐ। ओदे थमां 2 हथ गोलें बी बरामद होए ना। कुलगाम पुलस थाने च इस सरबन्धै च मामला दर्ज कीता गेआ ऐ।

<><><><><><>

Education Border

केन्द्र शासत प्रदेश जम्मू-कश्मीर दे हीरानगर दे सरकारी हायर सैकैन्डरी स्कूल चक्क कान्हा गी आधुनिक शिक्षा केन्द्र दे तौर पर तब्दील कीता जा'रदा ऐ। एह सब किश राष्ट्रीय शिक्षा नीति ते K-12 स्कीम तैहत कीता जा'रदा ऐ। आकाशवाणी जम्मू संवाददाता दी रिपोर्ट मूजब 4 करोड़ रपे दी परियोजना स्कूल दा दर्जा बढ़ाने लेई मिथी

गेई ऐ। इस जत्त दा मकसद ग्रामीण ते बन्नै आहलें इलाके च पैहली थमां 12मीं जमात तगर म्यारी शिक्षा उपल्थ करोआना ऐ। दर्जा बदाए गेदे ढांचे कन्नै पढाई दे म्यार च सुधार होग ते विद्यार्थियें दी कारकरदी बेहतर होग।

<><><><><><>

Kailash Mansrovar Yatra

विदेश मंत्री डाक्टर एस. जयशंकर होरें कैलाश मानसरोवर यात्रा 2026 लेई यात्रिएं दी ताल लेई कम्प्यूटर थमां ड्रा कडुआ। यात्रा दा 2026 संस्करण जून च शुरु होग ते अगस्त च खत्म होग। विदेश मंत्रालय नै इक ब्यान च आखेआ जे कुल इक जहार यात्रुएं गी इक निष्पक्ष कम्प्यूटर कन्नै बनी रैंडम-जेंडर बैलेंसड सिलेक्शन प्रक्रिया कन्नै चुनेआ गेआ ऐ। चुने गे यात्रु 20 बैच च यात्रा करडन। हर बैच च 50 यात्रु होगन- जेडे लिपुलेख ते नाथूला दरें थमां होइयै जाडन। दौने रस्ते हून पूरी चाली मोटर गड्डियां चलने जोग न ते हून एहदे च बडा मता घट्ट चलना पौंदा ऐ। यात्रु अपने चुनां सरबन्धी जानकारी दा पता करने लेई यात्रा वेबसाईट पर लॉग-इन बी करी सकदे न। ओह हैल्पलाईन नम्बर 011-230-882-14 पर सम्पर्क साधी सकदे न।

<><><><><><>

Mount Everest Record

नेपाल दी बक्खियां माउंट एवरेस्ट पर कामयाबी नै चढाई करने आले 274 पर्वता रोहियें च त्रै भारती बी शामिल हे- जिनें इक दिन च हून तक्कर दी सभ्भनें थमां मती चढाई दा नमां रिकार्ड बनाया ते इस टीम च शामिल त्रै भारती पर्वतारोही तुलसी रेड्डी पालपु-नूरी- संदीप आर्क ते अजय पाल सिंह धालीवाल शामिल न। इस बसंत च बनाए गे दुआ नमां रिकार्ड नेपाल दी कामी रीता शेरपा दा ऐ- जिनें 32मीं बारी चोटी पर चढाई करियै अपना गै रिकार्ड त्रोडेआ। इससै चाल्ली नेपाल दी लखपा शेरपा रिकार्ड 11 बारी माउंट एवरेस्ट पर चढने आहली इस सीजन च पैहली महिला बनी।

<><><><><><>

Pakistan -Miners Dead

पाकिस्तान च अज्ज खैबर पख्तून-ख्वा प्रांत दे शांगला जिले च 2 बक्ख-बक्ख कोला खदानें च होए हादसे च 2 कोला कडुने आले मजदूरें दी मौत होई गेई ते इक दुआ जखमी होई गेआ। पैहली घटना अखोखाल कोला खदानें च होई- जेल्लै के दुई घटना चपरमश्ती इलाके च होई। बचाव दल- साथी मजूरें ते मुकामी बसनीकें फसें दे मजदूरें गी बार कडुआ। मुकामी बसनीकें ते मजदूर संगठन- पाकिस्तान दी कोला खदानें च सुरक्षा उपाएं दी कमी पर डूंगी चैंता जताई ऐ ते सरकार ते सरबन्धित अधिकारिएं थमां इस मुददें गी फौरन सुलझाने दी अपील कीती ऐ।

<><><><><><>

IPL

IPL क्रिकेट च अज्ज संजा अहमदाबाद दे नरेन्द्र मोदी स्टेडियम च गुजरात टाइटन्स ते चेन्नैई सुपर किंग्स दा मुकाबला होग। एह मैच संजा साड्डे 7 बजे थमां खेड्डेया जाहग। गुजरात टाइटन्स नै पैहले गै प्ले ऑफ च अपनी थाहर पक्की करी लैती ऐ- जिसलै के चेन्नैई सुपर किंग्स अंक तालिका च चौथी थाहर आस्तै अपनी संभावनाएं गी मजबूत करने दी कोशिश करोग। तोंआई कल रातीं होए दे मुकाबले च कोलकाता नाइट राईडर्स नै मुम्बई इंडियन्स पर 4 विकट कन्नै जित्त हासिल करियै प्ले ऑफ च पुजने दी अपनी मेदें गी जिन्दा रखे दा ऐ।

<><><><><><>

Udhampur Girls

उधमपुर जिले थमां युवा महिला कराटे खडारिएं बेहतरीन प्रदर्शन करदे होई अंतराष्ट्रीय कराटे प्रतियोगिता च 9 तगमे हासिल कीते न। आकाशवाणी जम्मू संवाददाता दी रिपोर्ट मूजब प्रतिभाशाली खडारिएं हुनर- निष्ठा ते अनुशासन कन्नै बेहतरीन प्रदर्शन कीता ऐ। उन्दे प्रदर्शन नै मुख्य ते खित्ते दा मान बदाया ऐ। कोच ते सरबन्धी अधिकारिएं उन्दी सराहना कीती ऐ। उ'दी सफलता नै खेड्डें च जम्मू-कश्मीर दी दावेदारी गी मजबूत कीता ऐ। एदे कन्नै कुडियें गी खेड्ड आहले क्षेत्र च अगे बढने दा मौका हासिल होग ते होरनें गी बी प्रेरणा थ्होग।

<><><><><><>